

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 21 OKTOBER 2019 (ISNIN)

SOALAN NO. 7

Minta **MENTERI PENDIDIKAN** menyatakan adakah Kementerian sedar mengenai kemudahan dan infrastruktur Kolej Matrikulasi Labuan (KML) yang uzur dan menyedihkan memerlukan peruntukan segera bagi memastikan keselamatan dan keselesaan kepada pelajar dan warga KML.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin dalam memastikan fasiliti yang disediakan dalam keadaan yang terbaik agar pelajar dapat belajar dalam suasana yang kondusif. Kolej Matrikulasi Labuan telah beroperasi mulai tahun 1999 dan telah berusia 20 tahun. Setiap tahun, penyelenggaraan berkala dan penyelenggaraan pembaikan telah dilaksanakan bagi memanjangkan hayat bangunan dan mengelakkan kerosakan yang lebih teruk kepada fasiliti serta memastikan keselamatan dan keselesaan pelajar di kolej berkenaan.

Sepanjang tahun 2015 sehingga 2019, KPM telah membelanjakan sejumlah **tujuh juta lapan ratus dua puluh lapan ribu dan dua puluh ringgit (RM7,828,020.00)** untuk menyelenggara Kolej berkenaan. Selain daripada itu, KPM juga menyediakan peruntukan khas bagi pelaksanaan kerja-kerja penyelenggaraan dan pembaikan yang telah dirancang pada tahun semasa (Tahun 2019) serta pelaksanaan kerja-kerja penyelenggaraan yang akan dilaksanakan pada tahun hadapan (Tahun

NO. SOALAN: 7

2020) yang kesemuanya dianggarkan sebanyak **empat perpuluhan enam lima dua juta ringgit (RM4.652 juta)**. Untuk makluman Ahli-Ahli Yang Berhormat, kerja-kerja bagi tempoh 2019 dan 2020 ini akan dilaksanakan melalui Jabatan Kerja Raya (JKR) Malaysia. Daripada jumlah tersebut, sebanyak **satu perpuluhan tujuh juta ringgit (RM1.7 juta)** diperuntukkan untuk penyelenggaraan sistem perpaipan Kolej Matrikulasi Labuan. Proses perolehan telah disempurnakan oleh pihak JKR dan kerja akan dimulakan pada tahun 2020. Manakala baki peruntukan iaitu sebanyak **dua perpuluhan sembilan lima dua juta ringgit (RM2.952 juta)** akan digunakan untuk penyelenggaraan aset-aset lain di kolej tersebut.

Selain itu, KPM juga telah menyalurkan peruntukan sebanyak **enam ratus empat puluh satu ribu dan dua puluh ringgit (RM641,020.00)** kepada Kolej Matrikulasi Labuan bagi tujuan pembelian aset pada tahun 2017-2019. Kerajaan akan dan sentiasa prihatin dalam memastikan fasiliti yang disediakan dalam keadaan baik dan pelajar dapat belajar dalam keadaan yang selamat dan suasana yang kondusif. Kesemua peruntukan ini memberi manfaat kepada hampir 3000 warga Kolej Matrikulasi Labuan.

Sekian, terima kasih.